

EDITORIAL

Jossy M. Mansur



E IDEANAN 'RELIGIOSO' DI RUDY LAMPE

Ora bo priminti bo mester cumpli. Mi a bisa cu mi ta bay confronta e expresionnan religioso di Rudy Lampe, manera a sali publica den Amigoe di 17 di October aña 2000, y awe mi ta bay hacie.

Den su "Carta Abierta" dirigi na e maestronan di schoolnan Catolico, e ta trece padilanti un cantidad di opinion cu no ta cuadra cu e enseñanzan Catolico cu a sobrebibi binti siglo! Ban cuminsa analiza.

Rudy Lampe: "Jesus di Nazareth no a funda Iglesia Catolico, y tampoco a funda ningun otro Iglesia."

Awor, si Jesus no a funda ningun Iglesia, kico Rudy Lampe ta haci den paña di pastor den un Iglesia cu tur otro Catolico ta convenci a ser funda pa Jesus? Ta cua filosofia teologico Rudy Lampe ta propaga? Si e ta bisa cu no ta Jesus, anto ta ken a funda Iglesia Catolico? Con el a ser funda historicamente y na unda? Riba cual principionan spiritual el a ser funda? Cua ta e mensahe cu e ta propaga? E ta acepta Biblia y loke tin para den dje of e tin su propio 'Lampiblia'?

Rudy Lampe: "Jesus a muri como un disidente. Jesus a predica e Reino di Dios dentro di e tradicion profetico Hudio. Cristianismo como un religion nobo, y principalmente e estructura di Iglesia, ta di un fecha posterior. Jesus pesey mes no a nombra ningun Papa y Obispo. Pedro no tabata e prome Papa."

Wel, aki si Rudy Lampe a perdemi. Pakico nos a sifa di chikito cu Jesus a bisa Pedro: "Abo ta e baranca, y riba e baranca aki mi ta funda mi Iglesia." Ta di cua Iglesia Jesus tabata papiando? No tin para ningun caminda den Iglesia Catolico ni den Biblia cu ta Jesus a nombra e Obisponan! E ta hasta absurdo pa Rudy Lampe bin cu e expresion ey. Jesus no a nombra Cardenalnan tampoco, y e no a nombra Pastornan tampoco. Esey ta materia di Papa di Roma y su Colegio, pasobra nos a sifa tambe cu ora Papa di Roma papia tocante religion, e ta papia 'ex-cathedra', o sea cu infalibilidad!

Rudy Lampe: "No tin ningun representante di Cristo na mundo."

Si ta asina, anto pakico Rudy Lampe te awe ta usa e pañanan di pastor? E no ta un representante mas di Cristo na mundo?

Ami sempre a kere cu pastornan ta representantenan legitimo di Cristo na mundo, como guanan spiritual di Su Iglesia. Kier meen cu ora un pastor ta bisa Misa, y ta recrea e pasion y morto di Jesus e ta hacie 'a titulo personal' y no como un representante di Jesus na mundo? Mi a yega di lesa hopi disparate, pero esakinan si a rebasa tur limite posibel!

Rudy Lampe: "Ora ta sifa cu Obispo ta hefe di tur catolico e ta hopi lamentable, pasobra Catoliconan no tin hefe fuera di nan propio consenshi."

Esaki ta otro disparate di marca mayor! Con bo por dirigi un empresa, un Gobierno, un Iglesia, sin herarkia? Cualke institucion den cual cada ken ta haci loke e kier, ta bira un toren di Babel, un institucion sin pia ni cabez. Sin herarkia, bo no tin orden, ni disciplina, ni estabilidad. Iglesia no por funciona si cada ken ta haci loke su consenshi ta bise, y ta desobedece Pastor, Obispo, Cardenal, y finalmente Papa di Roma. E lo ta un Iglesia hopi tristo si e no tin e guanan spiritual cu ta percura pa e normanan ser obedeci. Ta ki clase di profeta Rudy Lampe ta? Di orden y disciplina dentro di Iglesia, o di desorden y anarkia?

Rudy Lampe: "Nos mester sifa e muchanan pa nan no baha cabez pa ningun hende, pa Obispo tampoco."

Esaki ta predicashi di desobediencia, di falta di respet pa autoridadnan eclesiastico, di anarkia dentro di Iglesia Catolico. E ta un postura negativo ora e ta nenga e vestidura y investidura di Obisponan, Cardenalnan y Papa di Roma. Esaki no ta disidencia mas; e ta un rebelion abierto contra tur loke Iglesia Catolico ta representa den materia di Fe, di estructura, di funcionamiento. Dios spar e Catoliconan di semehante 'pastor'!

Ami lo sigui kere cu Jesus a funda Iglesia Catolico, cu Obispo merece respet y obediencia, cu San Pedro tabata e prome Papa, y cu Papa di Roma, na cabez di su cuerpo di autoridadnan eclesiastico ta dirigi e religion cu mi ta profesa. Mi no lo pone pia nunca den un Misa unda Rudy Lampe ta oficia. Mi no por acepta e afan di Rudy Lampe pa destrui mi creencianan, pone na duda e estructura di mi Religion, y cuestiona mi Fe.